

- 6685 van scharpeme rade, van nouwen vunden.
 ik wil vórtmêr to allen stunden
 nicht mêr horen de over ju klagen.
 gy scholt vor my spreken unde dagen.
 ôk schole gy syn kenseler desses rykes;
 6690 myn seggel bevele ik ju des gelykes.
 wat gy bestellen, wat gy schryven,
 dat schal bestelt unde geschreven blyven. —
 Alsus is nu Reinke in der vorsten hove
 de aldergrôtste worden van love.
 6695 wat he slut efte wat he radet,
 it is al êns, it vromê efte schadet.

Dat twolfte kapittel.

Wo Reinke mit groter ere schedede út dème hove, unde boven allen
 anderen des konninges hulde unde vruntschop behêlt.

- Reinke dankede dème konnink sere;
 he sprak: ik dankê ju, eddele here,
 dat gy my sus vele ere dôt;
 6700 ik denke des wedder, bin ik vrôt. —
 De lerer, de desse historien schrêf,
 schrift vorder, wôr Ysegrim blêf,
 he lach in dème kreite, sêr ovel gevaren;
 syne vrunde gingen to eme by paren;
 6705 syn wyf, unde Hinze, ôk Brûn de bare,
 syne kinder, syn gesinde, syne vrunde weren dare;
 se drogen ên út dème kreite mit klagen,
 unde hebben ên up ener boren gedragen
 mit hoje, dâr he warm inne lach.
 6710 tohant men syne wunden besach;
 der weren twintich unde sessê.
 dâr quemen vele mesters van krummesse;
 se vorbunden syne wunden, unde geven êm drank;
 he was in allen leden krank;
 6715 se wreven eme krût in syn ene ôr,
 ja, do prûstede he bede achter unde vôr,
 de mesters spreken: eme schal nicht schaden,
 wy willen ên smêren unde baden.
 hiermede trôsteden se syne vrunde,
 6720 unde leiden ên to bedde tor sulven stunden.
 he wart slapende, doch nicht sêr lange;
 aldermêst was eme dârhen bange
 to synem teken an synen broderen,
 he haddet geloset mit al synen goderen,
 6725 de he syne dage hadde vorworven,
 dat he dâr so nicht were vordorven,
 besunderen syn wyf, vrûwe Gyremôt,